

Script of Morning Gojri News Bulletin 21 December 2025 at 1015Hrs

مارننگ گو جری نیوز بلیٹن مورخہ 21 دسمبر 2025

یوہ آکا شوانی جموں ہے محمد امین انجم تیں خبر سُنو۔

LG TB Mukht Bharat

لیفٹنٹ گو رنر منوج سنہا نے کل ایکن اعلیٰ سطحی میٹنگ غے دوران پر دھان منتری ٹی بی مُکت بھارت ابھیان غا جموں کشمیر مانہہ نفاذ غو جائزو لیو۔ اُنہاں نے تپ دق بیماری نانہہ ختم کرن غا سلسلہ مانہہ یوٹی انتظامیہ غا عزم غی فِر تصدیق کی ہے۔ لیفٹنٹ گو رنر نے محکمہ صحت تے ضلع انتظامیہ نانہہ ہدایت کی ہے ٹیسٹ غا کم مانہہ تیزی آئی جائے، نالے کمزور آبا دی غا نقشہ سازی نانہہ ترجیحی دین غے نال نال بوبے بوبے بیداری مہماں مانہہ بابدو کیو جائے۔ میٹنگ مانہہ جانکا ری دتی گئی ہے جے جموں کشمیر نے پروگرام غے تحت 99 فیصدی کمزور آبا دی شامل کر لی ہے، تے اس طرح 28 لکھ 62 ہزار 6 سو 86 افراد پروگرام غے تحت لے آئیا ہیں۔

CM Snowfall

وزیر اعلیٰ عمر عبداللہ نے کہیو ہے جے انتظامیہ نے جموں کشمیر مانہہ متوقع برفباری سنگ نمڑن غی خاطر تمام ضروری انتظامات کر لیا ہیں۔ اُنہاں نے کہیو ہے ان تدبیراں غا اثر غو اندازو اک بار برفباری شروع ہون ور لایو جائے گو۔ جائزہ میٹنگ تیں بعد اخباری نمائنداں نال گل کرتاں واں وزیر اعلیٰ نے کہیو ہے خشک موسم غی وجہ نال پانی غی کمی تے آلودگی غی سطح مانہہ بابدو ہوئو ہے۔ وزیر اعلیٰ نے کہیو ہے بارش تے برف ہوا غا معیار مانہہ بہتری آنے گی نالے آبی ذخیرہ فِر پھریا جائیں گا۔ موصوف نے مزید کہیو ہے متوقع برفباری یوٹی مانہہ سرمائی سیاحت غی شروعات کرے گی۔

Pulse Polio

پلس پولیو مہم 2025 غے تحت اج جموں کشمیر مانہہ صفر تیں 5 بہراں تک غا 19 لکھ تیں متا بچاں نانہہ پولیو غی بیماری غے خلاف بوند پلائی جائیں گی۔ اس ضمن مانہہ 22 تے 23 دسمبر نانہہ کھر کھر جا غے دوائی پلائی جائے گی، تانجے یقینی بنایو جا سکے جے کوئی وی بچو دوائی پین تیں محروم نہ رہ جائے۔ خاندانی بہبود غی ڈائریکٹوریٹ نے جموں کشمیر پھر مانہہ 19 لکھ 85 ہزار 7 سو 36 بچاں غی شناخت کی ہے، جنہاں نانہہ پولیو تیں بچائو واسطے دوائی دتی جائے گی۔ اس مہم غی خاطر 10 ہزار 9 سو 93 بوتھ، 248 خاص تھار مقرر کی گئیں ہیں۔ اس سلسلہ مانہہ 5 سو 18 مو بائل ٹیم وی کم ور لائی گئی ہیں۔

Rustam e JK

کھیڈاں غا وزیر ستیش شرما نے کل اج تک غا پہلا بین القوامی دنگل اور رستم جموں کشمیر غا کامیاب کھلاڑی اور حصے داراں نانہہ مبارکباد دتی ہے۔ اس سلسلہ مانہہ مُلک

پھر تے دوجا مُلکاں تیں وی پہلواناں نے حصو لیو۔ اِس سلسلہ مانہہ اِشاق احمد نے اعلیٰ درجہ غو خطاب رُستم جموں کشمیر جتیو۔ اِس ضمن مانہہ دو نمبر ور عامر خان رہیا اور دلیر خان تے صادق گجنسو نے تیجو مقام حاصل کیو ہے۔ ہر یانہ غا پہلوانن دنیش دھنکر نے روس غا پہلوان نانہہ ہرا غے بین القوامی دنگل جتیو۔ دوجا مقابلہ مانہہ ایران گا پہلوان حمید نے پنجاب غا لکی کوہلی نانہہ ہرایو۔ اِسے طرح جموں کشمیر غا ضلع ڈوڈہ غا پہلوان ندیم نے ایران غا پہلوان عرفان نانہہ ہرا دتو۔ جموں غا پہلوان ارجن نے ایران غا پہلوان نانہہ ہرا دتو۔

Tenant Verification

جموں کشمیر پولیس نے با ریں اک آن لائن پورٹل شروع کیو ہے۔ اِس پورٹل غو مقصد کرایہ داراں غی ویری فکیشن کرانو ہے۔ آکاشوانی جموں غا نمائندہ نے رپورٹ توری ہے جے یوہ پورٹل ایس ایس پی جموں نے شروع کیو، جنہاں نے کہیو جے اِس پورٹل غی مدد نال اندرونی سلامتی بدھے گی۔

Announcement

آکاشوانی جموں غا علاقائی خبراں غا شعبہ غی طرفوں کساناں بارے قومی تیہاڑا 2025 غا موقع ور 25 منٹ غو اک خصوصی پروگرام نشر وے گو۔ اِس خصوصی پروگرام غو موضوع وے گو "اُن بتھاں نانہہ سلام جہیڑا مُلک نانہہ کھلاویں"۔ اِس خصوصی نشریات مانہہ مہارہا مہمان ویں گا جناب سنجے آنند جو انٹ ڈائریکٹر برائے ذرعی پیداوار تے کسان بہبود جہیڑا اپنا سیانہ نظریات سانجھا کریں گا۔ پروگرام غی میزبانی مہارہا اینکر وجے بجاج کریں گا۔ یوہ پروگرام منگلواریں 23 دسمبر نانہہ دوپہر 12 بجے نشر وے گو۔

Weather

اج سرگی ویلے ڈوڈہ مانہہ ہلکی بارش ہوئی ہے، جد کہ گلمرگ مانہہ تازہ ہلکی برفباری ہوئی۔ محکمہ موسمیات غی پیشنگوئی غے مطابق اگلا 2 تیہاڑاں مانہہ مغربی ہمالیہ خطہ مانہہ برفباری وے گی۔ محکمہ نے کہیو ہے جے جموں کشمیر تے لداخ غا گُجھ حصار مانہہ اج پہاری برفباری غو امکان ہے۔

Traffic Advisory

متوقع برفباری غے مد نظر ٹریفک پولیس نے اک تفصیلی ایڈوائزی جاری کی ہے، اِس سلسلہ مانہہ مسافراں نانہہ صلاح دتی گئی ہے جے ویں جموں، رام بن تے سرینگر مانہہ ٹریفک کنٹرول یونٹاں تیں سڑک غی حالت غو پتو لا ویں، تے سرکاری سوشل میڈیا تیں تازہ جانکاری حاصل کریں۔

اس غے نال ہی خبراں غو یوہ بلیٹن ختم ہوؤ۔